

黃劬靈先生年譜

鄉後學狄廷鑑
題簽

價678.04
824
2

澤陽仙山黃劬雲年譜卷之二

康熙元年歲次壬寅三十二歲余乘舟赴京順
赴部投咨文也

甲辰年三十四歲初奉部議凡大選急選官員
俱到部投供余於二月初一日赴吏部是時隨
官惟從七品一項最為壅滯會奉文投供聽判
者惟余等七人因得以次先補八月補有餘
津衛經歷才月中茲任丙人亦同日補

溧陽仙山黃劬雲年譜卷之二

康熙元年歲次壬寅三十二歲余乘舟進京將赴部投咨文也

甲辰年三十四歲初奉部議凡大選急選官員俱到部投供余於二月初一日赴吏部是時降官惟從七品一項最爲壅滯會奉文投供驗到者惟余等七人因得以次先補八月補直隸天津衛經歷十月中蒞任內人亦同日到署頽垣

陋室中自土炕而外一無有也閒曹冷况門可張羅但幸無錢穀刑名之責得寄情詩酒以吏爲隱十一月兼攝天津衛儒學事遷學舍近聖人之居是年會試奉新例第一場以策試士不用八股余在京邸取歷朝綱鑑編纂鑑畧一本使兒童初學時讀之以爲稽古先資

乙巳年三十五歲衛學諸生有執經問難者有持文就正者吟風立雪宛似昔年開館時余終日娓娓皆未嘗無誨焉官雖卑頗覺清高時同城天津道楊公諱廷錦鹽法道周公諱卜世運同潘公諱瀛選府同章公諱國佐皆賢大夫也適館授餐以賓友之禮相待余因學宮漸圯乃卜吉張樂設讌大會諸公於明倫堂親省視倡率勸捐鳩工庀材立黌門鑿頰池規模宏敞牆垣鞏固俾廟貌煥然一新學院蕭公諱惟豫余同年友也按臨河間余往送考以道義相合禮

遇甚隆余謫居得博涉羣書

丙午年三十六歲自題草堂云人間似與鷗相狎戶冷兼無雀可羅終日持樽酒對盆花聊以遣懷偶披閱邵堯夫先生擊壤集其詩曰事到悟來皆偶爾天教閒去豈徒然因自惜光陰莫令閒過日讀昭明文選取歷朝詩集校訂之於陶靖節杜少陵兩先生集尤捧誦不能釋手當時官於津者皆甲乙文人知余有詩酒之興嘗

載酒相約同遊卽事賦詩余在望海閣所咏海景有云千里黃雲潮上湧五更紅日浪中翻所咏河亭有云魚翻白浪浮還沒鳥啄紅英去復來諸公咸謂有盛唐風致更相酬和此序文傳記皆屬余代爲之所得筆資卽以償酒債頗慰寂寥又有高僧字介先者淨六根皈五戒旣通釋典復工書法與余爲方外交所居楚剎有精舍介上人嘗靜坐其中惟余至則設一榻煮清

泉拊素琴流連信宿余所贈詩有云月上已知
僧入定雲行應笑客忘歸又云喜得閒身隨佛
子懶將迂性對時人旁觀者至以介上人比之
遠公焉

丁未年三十七歲春三月家君來爲憶子也署
中甚湫隘僅容膝菽水之外無可供甘旨者家
君亦安之但以有孫在家嘗永念曰汝在此宦
三年矣吾與汝母未嘗不一日九迴腸也汝子

麟自去年出就外傅每入內必問曰吾父母何
日歸來乎彼幼冲亦知孺慕言及此輒潛焉欲
淚蓋昔在家則憶其子今在署又憶其孫乃祖
乃父之心固如是也居月餘知天津離長安甚
近因往遊帝京浹旬而返俟暑退歸心愈切
憶孫也余室人亦憶其子乃買舟俱送之南旋
戊申年三十八歲署靜海縣事是年遭水災而
靜海乃九河下流尤爲澤國余備陳被災情狀

造報饑民萬餘口不啻鄭監門之所繪者蒙
皇上子惠困窮宏開捐納之例以賑濟焉余在
縣四閱月以河工賠累又因前令毛某被劾時
驛馬倒斃余未及追補新令衛竟勒余墊償余
亦不與之校也兩尊人以余任所中饋無人娶
妾王氏送至署

己酉年三十九歲肅甯知縣薛姓者以貪橫被
劾直撫金公委余署理印務方下車卽咨訪民
間疾苦其邑中地畝之圈給旗下者清查地界
使旗人不得界外隱佔撥補鄰邑者酌定租額
使鄰邑不得額外苛取革火耗除私派代虐以
寬民大悅署事半載餘與新令黃襄膺交代去
之日通邑士庶扶老攜幼頂香爐攜果盒擁道
而奉觴者萬餘人蓋三代之公猶在人心也是
年鄉試復用八股業余取歷科程墨選評二百
餘篇寄麟兒以爲文式八月初二日妾王氏生

子鳳兒

庚戌年四十歲春正月肅寧縣新令卒本府已詳委河間縣縣丞矣其邑人聞之父詔其子兒勉其弟皆齊集保定環院門而號呼曰願再借黃公一年撫院金公素知余持守廉治績屢著卽從民所請批委余接署而余在天津距肅邑幾四百里初不之知也檄下之次日肅邑人騎竹歡迎者直至天津當是時民視余猶父也余能不視民猶子哉因念余去年釐剔積弊民生雖遂民教未興乃大書天理人心四字勒在縣前每朔望諳諳曉諭凡旗人及汎兵之與民爭者余卽以天理人心勸諭之不至終訟邑有富人劉義侯旗棍也常以債魚肉鄉民民畏之皆莫敢言道路以目余一日坐於堂上急遣人召之鮮衣怒馬貿貿然來問余曰何爲者余曰亦教汝識石碑上四字耳隨令左右拽以出擁至

碑前去其冠令之跪傳一能言之鄉老使逐字指示之彼初猶強項因見余詞色嚴厲兩旁指示森羅不覺形神消沮炎日中露頂屈膝自辰至酉不啻撻之市朝矣乃私謂鄉老曰某小人也雖知罪然終不解爲某事何不帶某至公庭面數之鄉老以告余度此人已挫辱如不欲生呼之入汗如雨長跪請罪余溫言諭之曰汝何獲罪於余但汝生平行事獲罪於天吾碑刻第一字卽天也對天必當跪故令汝跪於天之下熟識天理人心四字耳隨問之曰汝有子否對曰無余曰然則此碑前卽汝求子處也吾視汝亦有年矣聞汝有妾數人皆無出何尙不回心種德而乃多行不義盤人田產折人子女以上干天譴乎汝能聽吾言常服膺天理人心四字何患無後劉義侯連叩首曰青天教我矣當改之余曰善哉亟以手拱之冠而起令左右宣言

於衆曰劉義侯之所跪者天也非人也何足怪
焉義侯卒能改行爲善邑種桃一望數十里其
花灼灼其實纍纍河陽耶武陵耶余清閒無事
時往遊觀焉自春徂冬果如衆父老再借一年
之願歲將除始離任返天津肅邑人之攀轅遮
道者復如初是年秋聞吾家遷居春雨橋新買
住宅也家君以仁柔爲賣主所欺旣勒重價復
以非禮相加幾不堪家君曰吃虧人自有好處
卒隱忍焉噫寸椽寸土創業者蓋若斯之難也
惟望後人敬以守之

辛亥年四十一歲署鹽山縣事其前令陞任者
也及余奉命往而部選之新令至矣甫一月卽
言旋追維曩時諸上人知己之感皆不可得而
見之矣杜門屏跡雖在任所如處深山將邇年
自著詩文彙成一帙弁之曰津門草

壬子年四十二歲正月十二日訃音至驚聞先

考玉樓府君以辛亥年十二月初七日寅時疾終正寢嗚呼痛哉府君生於萬厯辛亥年八月初二日未時今享年僅六十一歲乃遽棄不孝孤而長逝耶府君之嘉言懿行固已洽於鄉評載諸郡志矣但未得請諸大人先生華袞闡揚恐不孝將填溝壑謹和淚追述其梗概焉府君自少以醇謹聞周旋中規言笑不苟其在家庭侍二親左右必下氣怡色先意承顏愉愉如也書館中整襟危坐對聖賢書必肅然斂容莊誦罔敢戲渝凡所讀古文時文皆手錄書法精楷在鍾王之間先大父鏡宇公嘗謂其有儒者氣象孝事嫡祖母及本生祖母始終如一執親喪一循古禮哀毀骨立歲時祭祀輒嗚咽不能已伯父兩人長諱鳴球次諱鳴玉皆嫡出也府君克恭厥兄家事無巨細悉以咨決析產時祖遺第宅田園僮僕應分者悉聽兩兄指授不出一

言嘗勸諭吾母潘孺人曰兄嫂宗子宗婦也吾夫婦當惟命是聽能讓乃和潘孺人亦體此意妯娌式好待同母弟鳴佩友愛甚篤諸姪貧不能婚者悉爲之完娶本宗有逋欠錢糧者卽代之納視同一體扶危濟困排難解紛生平未嘗有疾言遽色與人接物自士大夫以至閭里細民皆藹藹然坦坦然無機心無客氣卽或有非意相干者亦以情恕以理遣弗較也甚至命運不辰罹土寇之毒痛慘遭劫掠被里役之株連痛受笞囚歷飢寒拋鄉井人世艱苦無所不經皆處之泰然不怨不尤何憂何懼其襟懷瀟灑誠有大過人者足跡不履長吏庭遇公事侃侃正言不避嫌怨邑侯徐王二君三請府君爲鄉飲大賓使通邑士民皆有所矜式古語云盛德者必有後不孝自田間來未嘗學問遂得博一第膺一命府君之所積也初爲司李不忍有冤

民厯署邑宰不敢有苛政功名雖蹇志節無虧
俱府君之所教也自傷位卑祿薄未能迎養留
麟孫於家依厥祖爲命府君與吾母潘孺人恩
勤鞠育愛此孫如掌上珠今乃不及見此孫之
成立也嗚呼痛哉不孝生不獲侍養病不能嘗
藥歿不及視含反不如子婦趙氏之能割股和
湯典衣佐殮養生送死克盡孝道也不孝瑾罪
通於天尙可以比數於人哉五內崩裂不能奮
飛通詳各憲後乃奔回三月念四日戌時泊舟
濟甯側室王民生一子以其生於濟水也名之
曰濟兒四月初六日匍匐詣柩前泣血哀號幾
不欲生日夕在苫次心神憤亂未及精研地理
遂輕聽庸劣堪輿誤將府君靈柩安厝后泊社
庄卽不孝受生之處也撤庄屋爲塋以葬是年
余因仙山合族未有公祠乃捐金買公屋置祭
田使式憑焉

癸丑年四十三歲余以讀禮謝交遊屏外事念
吾家居城應立家廟乃於本宅之東續置房一
所以樓上三間安神座供奉三代神主座下有
櫺二可藏祭器座前設几案朔望焚香歲時置
祭令諸子從師讀書於左右兩楹庶幾藉先靈
以警惕之也但此亦目前權宜計耳前無饗堂
後無寢室焉得爲家廟哉卜善地而經營之乃
逞吾願今雖量撥青安橋田六十四畝九分地
六畝一分長巷田十二畝以供祭祀亦未成享
也寸心耿耿何以自安

甲寅年四十四歲四月十三日服闋以老母春
秋高諸子幼惟鍵戶養親教子不赴部補官

乙卯年四十五歲大兒夢麟學業將成矣余回
籍三年以來旣延師湯觀光先生在館訓誨而
余又晨夕嚴督所講書必令覆解所誦生熟文
必令覆背其所習詩經所讀策論表劄皆余親

自爲之講明者每逢三六九日所作大小題二
藝必爲之親閱錄其瑜摘其瑕余嘗自作文以
開示之隨時提命觸處引伸蓋每日自朝至暮
無一息間斷每年自元旦至除夕亦無一日間
斷也雖爲童子三場亦已粗曉是年六月解文
宗考取入泮七月錄遺第二名入闈應試麟兒
方出頭場告余曰昨日闈中忽夢一長者自稱
吾乃陳百史也執吾手畫一字於掌中曰謹記
之方私喜自負不意次日乃以壽字少一畫貼
出爲余所切責然乙丑科之一甲亦卽此一畫
爲之兆也陳百史先生以里中前後探花蚤示
以夢亦奇矣哉十一月爲麟兒娶婦費氏壬辰
進士戶部郎中諱達公孫女庚子副榜候選知
縣諱鈺公女
丙辰年四十六歲周象曲先生蒞寒舍誨諸子
師範旣嚴其講書閱文循循善誘教益宏多

丁巳年四十七歲六月初九日寅時大兒初生子以其時將旦也名之曰旦且古人嘗有名之者德與位俱隆焉且孫勉之哉乘旦氣法古人則多福方來將亦如日之升矣是年有當事行查吾邑縉紳家田房稅契其富者皆視爲奇貨必贖焉乃已余貧田房無幾皆已稅乃得免傳曰貴而能貧民無求焉可以後亡昔韓宣子憂貧叔向賀之貧洵可賀也

戊午年四十八歲照兒以例得列名黌序取名友恭欲其顧名思義克恭厥兒友於諸弟也秋八月麟兒以鄉試未售益勵志舉業

己未年四十九歲余嘗詣先父墳塋審視地形既無來脉又無穴情山旁竄水斜飛上不分下不合明堂不正兩界不清龍虎兩臂不環抱知其穴內必有水也二月二十四日啟視之果在巨浸中余目擊心傷雖自投於穴從先父於九

原亦不足以贖其辜也乃卽日扶柩暫停仙山村正廳之中余以先人未安厝不敢寤居自本境以至義興金壇建平諸邑陟嶽降原尋龍探穴欲求一藏風聚氣之吉地而卒不可得亦因余德薄所以踏破鐵鞋無覓處也是年七月初七日老母七旬壽誕余率諸孫奉觴爲斑斕之舞親朋咸賀

庚申年五十歲溧邑旱潦薦臻民多饑饉余捐米以助賑焉有貧民錢太和等所借貸不能償余查原券悉還之麟兒以歲試一等得食餼辛酉年五十一歲六月田文宗科試生童麟兒一等第七友恭亦列名一等鳳兒入泮頗慰余心八月念六日秋榜發報者至麟兒中式第二十一名老母喜甚曰孫登科庶不負乃父之期望矣惜乃祖不之見也往省親供將上公車老母以孫年少長途懸憶乃命余送之行

壬戌年五十二歲正月至京師大學士高陽李
夫子諭余曰子年力方強蹉跎歲月十餘年矣
既不能援捐納例開復原官然前俸已深今往
補即可陞正印目前新進士欲得一縣需次無
期子尚易易何遽自廢棄耶強余赴吏部投供
三月念五日掣籤補貴州衛經歷是時麟兒下
第已策蹇先歸矣六月余始歸卽俛伏老母膝
前涕泗橫流蓋不俟老母出諸口而自念母子
至情依依戀戀復何忍舍萱親而遠去哉八月
初鳳兒患痢死余志益灰遂決意不之任是年
十月爲友恭娶婦潘氏余表弟庠生諱之偉公
女也聞自幼能率母教乃締姻以敦世好
癸亥年五十三歲余雖欲棄官將母而文憑未
繳必致部查江蘇藩司丁公余在天津時舊上
臺也往見之披瀝苦衷具呈告終養卽蒙溫諭
曰查告終養之定例必須在任所取結咨題從

未有在籍告終養者但見子情詞肫懇使我心
惻今試爲子行之 皇上孝治天下雖不允亦
無礙也隨行府縣取印結轉詳撫院余公咨吏
部余明知無在籍告終養之例惟冀部議革去
此雞肋則余心安親心亦安矣未幾奉部文不
准終養亦不卽處分仍行令地方官勒催赴任
取起程日期咨覆十月望後本縣差役臨門敦
迫余萬不獲已跪辭老母不能起老母含淚送
之門曰行也慎自愛蓋此時余五內已寸裂矣
卧舟中踰胥壩由涪湖以達蕪關家人告余曰
自今以始每日大江逆流而上吾主僕五人雇
小舟且防匪類莫若附賈客以行舟大且穩又
人衆不患剽竊也余從之與賈客雜坐沽村醪
聽漁歌傍晚艤舟必趨岸弔古攬勝凡江上風
景領略殆遍過彭澤曰吾復爲五斗米折腰有
愧陶靖節先生多矣至武昌登黃鶴樓讀崔顥

詩如所詠晴川閣漢陽樹猶歷歷在目也而鸚
鵡洲已不可復覩爲禰正平歎息者久之望黃
州以不得遊赤壁爲恨惟喜宿巴陵得縱覽岳
陽樓勝概因憶范希文所云去國懷鄉憂讒畏
譏滿目蕭然感極而悲者乃余今日登斯樓之
幽思也而昔人早已見及此何其善於情哉由
岳州府出口卽洞庭湖矣余所附商船重值冬
月湖水有淺處不可行留湖中十餘日時而陰
雨迷離水天若接無分上下莫辨東西時而碧
波容與日星交映遙睇萬峯極目千里識陰陽
之遞變察宇宙之無窮因念余生平於山見泰
岱之高於水見河海之大且深自以爲極天下
之大觀矣今復涉洞庭湖浩浩蕩蕩茫無津涯
又天下之一大觀也則余之濡滯於洞庭不可
謂非幸也自常德府以上皆灘河乃馬伏波征
交趾故道余始獨坐一鯁船甚低小不敢不踞

沂辰溪渡瀘水奔濤激湍層巒峭壁所聞者虎
嘯猿啼欲如江湖中流連名勝不可得矣主僕
五人舟行百餘日約用路費銀三十餘兩
甲子年五十四歲正月念六日至鎮遠府距省
城陸路幾四百里余乘一肩輿以無腳力可雇
家人皆徒步相從走相見坡過飛雲巖油榨關
等處誠如杜少陵所云山從人面起雲傍馬頭
生者行十日方抵貴州省因無解寓五顯廟中
謁藩司柯公呈繳文憑已違限一年零三月矣
余方意得照例革職遄反故鄉以慰老母倚閭
之望也楊公具疏奏明部議以違限有因竟置
弗問夏五月委署黔西州印務黔西自今
御極始入版圖所屬苗彝不一種余撫之以恩
信罔不帖然十月奉文察丈清隱估均賦役民
咸便之黔西地畝不徵銀每畝徵大米三斗以
供本城汛兵口糧每年計所入與所出之數適

相準無存倉者因前官採買米過多而黔西倉始有餘糧矣奉憲檄令協濟威甯大定兩鎮兵月米因累及黔西之苗民奔走運送每一人僅負米三斗披深箐踰峻嶺苦不可言余爲之亟請於各憲以威甯路最遙阻得改運折色始不至疲於奔命焉

乙丑年五十五歲余前後歷俸八年有餘矣春正月陞授廣東潮州府海陽縣知縣三月初始聞量移之信黔西新州守亦至別無可交代但倉米一項所撥給威甯鎮兵糧折色銀未完然有現欠在民者可以接徵又有未詳改折之時先收本色米在倉者可以變價是皆有抵項並無纖毫貽累也新州守刻意留難必勒余墊完然後已余以急於行皆稱貸而與之四月初鬱鬱回貴陽寓大興寺聞麟兒會試中式第十八名魁本房乃喜五月初一日文憑至初二日領

憑甫出藩司署值提塘遣人來報云麟兒殿試第一甲第三名應授翰林院編修余喜出望外初八日由黔省起程陸行七日至鎮遠府卽登舟順流而下六月初十日抵平陵一月中行七千餘里方謂其時來風送也孰意老母潘孺人已於本年正月二十八日卯時壽終於內寢其報訃者乃於江湖中相左也嗚呼痛哉不孝兒歸來矣何連呼老母竟不聞不見也父歸天兒在燕母卽世兒又在黔父母有子而無子不孝兒雖爲蠶粉亦胡足以蔽其辜耶罪孽深重不死何俟但念老母生平之賢孝惟兒習聞之中年之艱苦惟兒親見之而不稍緩須臾死以頌颺其一二則不孝滋甚謹瀝血略陳之太孺人姓潘氏世居城南之大村考諱曾琦饒於貲慷慨豪俠元配湯氏生子女三人太孺人其長女也自幼嫻內則卽能治家外祖母與外祖母甚愛

之先大父遣媒妁求婚外祖曰黃氏世德高門素所知也但此吾愛女欲爲之擇佳壻尙將親訪焉乃屏人自往仙山詢知先府君器識不凡乃許字年二十于歸府君能執婦道諺曰兩姑之間難爲婦太孺人善事適祖母勤謹和順皆得其歡心與兩伯妯偕常和協永無間言待下人以恩言不及外大父每稱之曰賢哉婦先府君嘗從師於外不問家事課農課子何有何無皆太孺人所經理也舅姑歿居喪盡哀如子嗟乎人世間興替不常自大喪相繼多難頻仍之後田廬荒廢賦役累賠先府君敲骨於庭太孺人錐心於室誰謂荼苦殆有甚焉不孝瑾嘗見太孺人之抱甕以汲也拾薪以炊也晝則舂磨而夜則紡績也辛勤若此於心安乎又常見太孺人之麤糝爲飯也野菜爲羹也骨簪半缺而縫衣百結也飢寒若此於心安乎尤可痛者太

孺人先產不孝瑾次生女卽今適錢門者雖力作猶攜抱子女以往家貧每日煮薄粥三餐太孺人惟飲湯耳其盂中之米粒悉含以哺諸子未嘗自下咽也鬻子之閔皆不孝瑾所目擊心傷者乃天者天矣不孝瑾幸長養成人忝科名通仕籍猶不能供子職筮仕以來太孺人至閩未一載卽南還及謫官瀛津竟未得迎養雖以父喪回籍後侍太孺人膝下十餘年每自恨未能竭力養志而太孺人亦節儉如常自甘淡薄常是時諸孫環繞食指漸繁卽有一味之奉必徧分之至盡乃已所親嘗無幾雖能飲不過三爵不孝瑾方竊歎太孺人半世食貧劬勞已極而至於今終未嘗享一日之福也於心究何能自安乎古人且不欲以三公易一日之養不孝瑾乃以衛幕微員背慈顏宦天末太孺人臨終時凡嘗藥視含諸事惟藉兒媳趙氏代爲之則

是不孝瑾雖生猶死亦若與諸夭者同歸烏有也嗚呼痛哉天何奪我太孺人之速哉稍延兩月則太孺人得聞孫夢麟及第矣再延五月則太孺人得見子如瑾歸里矣而今竟安在哉已矣不孝瑾將相從於地下矣能闡述大父大母之德音以光泉壤者是在麟孫矣太孺人以庚戌年七月初七日子時生享年七十有六不孝瑾方枕塊泣血遣僕具呈當事稟繳海陽縣文憑又以無在籍繳憑之例蒙發回令速往粵東親繳余曰死則死耳天下豈有忍心至此者哉哀懇迫切蒙江蘇撫院湯公破格咨題外官得在籍繳憑自此始七月廿二日亥時大媳生一女八月令老伴往吳郡雇舟送大媳與旦孫進京冬十一月家人徐方之妻誤失火延燒下人居屋七間距內樓僅丈許火燄已射入樓窗矣昏黑中無所措手惟其守太孺人柩稽顙籲天

俄而半空中若有救援之者其火竟自熄太孺人之靈耶吾祖父之德耶天地鬼神之呵護耶何以當之敢不祗畏

丙寅年五十六歲邑中通學庠生公議以先祖考鏡宇公進修允迪文行兼優孝友素篤於家庭仁義覃孚乎鄉國研窮性命理學闡四子之精微淹洽典墳著作萃八家之英藻雖數奇不偶九試尚困於諸生而善積有餘一經長發於弈禩輿情允協祀典宜隆連名上呈由儒學備具印結送縣中江甯府蒙府轉詳藩司藩司通詳江蘇湯公學院李公俱如詳優獎批允崇祀以表彰潛德隨蒙藩司劉公備敘憲批卽發知照行府轉行本縣擇四月初十日恭送明邑庠生黃公諱懋德之神位崇祀鄉賢祠是時有大學士宋公宮詹宗伯湯公掌院孫岷瞻先生庶常張石虹先生所撰墓表傳贊謹彙刻永思

錄以傳不朽本年三月內父趙理之先生卒享年八十有二先生諱綸字理之余內父且業師也宋名臣趙公諱葵之世裔貌清癯若不勝衣能攻苦讀書好學深思所著學庸論孟講義皆融會大全或問蒙引存疑諸書而得其要領理識淵宏能悟先儒之所未發作制藝最有骨力取精於經史左國不屑爲靡靡浮響與同邑史冠卿芮巖尹馬章民諸先生爲瀨上十三子互相倡和文望日崇受業於門牆者日益衆其爲師猶得古人設教之遺意先使之敦倫紀明禮讓變化氣質進於爲善之路然後請業凡講書必開示以當日立言之旨實義與虛神俱暢凡論文必指授以先正審題之法來脉與去路俱清析疑問難四方之學者固莫不奉爲山斗也先生自少有聲譽序明啟禎間試輒高等乃以數奇不遇鼎革後遂絕意進取爲逸民爲處士

既痛其積學之未售矣尤可痛者砥礪名節如公而卒未有後天之報施善人其何如哉先生元配唐孺人素賢淑生女二長適如瑾生子夢麟次適芮

丁卯年五十七歲春二月李文宗科考濟兒入泮名抃鶴欲其享鶴算且希踪趙清獻公之以琴聲鶴影揚名史冊也余以九月服闋從弟允秀貧不能婚爲娶婦張氏十二月初一日到京就養於麟兒邸舍是月念五日太皇太后崩麟兒詣永康門前守國喪雖除夕未嘗回寓

戊辰年五十八歲二月十六日大兒夢麟欽點會試同考試官三月二十五日余補授錦州府廣寧縣知縣六月十九日到縣署滿目荒涼草房陋土炕壞碎釜難炊瓦缶不給按縣治西至閭陽驛東至巨流河南至海北至邊周圍三

百餘里問其人則皆內務府新舊滿洲八旗下園丁兵丁站丁各庄頭壯丁諸人而縣屬丁民不過二千餘口又皆招徠者也何以綏之問其地亦皆內務府新舊滿洲八旗下園丁兵丁各庄頭壯丁之地而縣屬熟地不過二萬餘畝餘皆拋荒者也何以闢之且以雜處孔多告爭時有既患其解紛之無術而况幅幘遼濶攘竊潛滋更憂其弭盜之難周邑最苦官又最難孔子

謂言忠信行篤敬隨在可行茲雖滿漢各殊軍民不一此心同此理同也余蒞任卽手書天理人心四字鐫石於縣治之前其來詣縣堂者隨人隨事必指示碑上天理人心四字爲晨鐘爲木鐸諄諄勸戒焉革耗羨除雜派淡薄自安邑中賦少而訟簡甚閒暇無事幸有次子友恭長孫旦相隨任所惟督率之讀書講制藝以消永日署後有小園可植菜茹命小奚薙草種蔬凡

爨汲糴秣諸事皆令家僮爲之不用民間一夫也冬十月二十三日欽奉恩詔應得封贈父鳴珂初封徵仕郎今勅贈文林郎廣甯縣知縣母潘氏勅贈太孺人如瑾勅授文林郎妻趙氏勅封孺人長子夢麟以官翰林院編修勅授文林郎媳費氏勅封孺人己巳年五十九歲正月初一日恭從欽命正白旗都統阿公望祭遼太祖陵初六日恭從

欽命內大臣一等伯新公致祭北鎮醫巫閭山之神醫巫閭卽虞舜所封十有二山之一周禮職方氏以醫巫閭爲東北幽州之鎮是也北鎮廟在廣甯城西門外五里許歷代以來每遇大典必遣官祭告是日祭畢余賦詩紀事有嶺上雪添圖畫色松間風和管絃聲之句頗膾炙人口二月丁祭前一日以文廟中東西二廡先賢先儒神位未設乃校正位次虔制木主俾式

憑焉合學文武生員不過二十餘人間有持文
藝就正者亦各因其材而教之余自蒞任以來
每念兩先人停柩未葬焦心如焚又常患噎逆
之症志切首丘於三月初一日援外官告病之
例詳請休致而邑中士民間之竟不諒予心星
夜詣憲轅以請留廉吏等事公呈懇留情詞肫
篤余求去益切各憲勉留益堅廣甯邑雖蕞爾
形勝殊有可觀城以內屹然而並峙者唐太宗
時所建雙塔也塔下有文殊菴修建喬皇余往
觀焉爲碑文以記之城以外巍然而綿亘者醫
巫閭山也山靈有赫而廟貌久湮北鎮尊神幾
露處風雨不蔽余怒焉憂之既告成作小序勒
之石廟前竒松堪與報國寺相頡頏者廟後有
石洞旁一古井泉甚清冽余每以春祈秋報常
自備香醴禱於廟往來井上必飲泉數甌乃返
守廟僧私相謂曰人言黃公在廣甯終日飲水

耳今果然閩山中名刹相望如觀音洞觀音閣等處亦一往過之然以年邁不能常登眺矣夏六月避暑於小圃之草亭顧鏡中鬚髮盡白吾老矣恐諸子未必能如張公藝之九世同居莫若及余之能舉筆也各授以分部一本取田廬奴婢而鬪分之其分部中復有分命諸子之訓詞語雖各異意可參觀所諄諄切切者大抵教諸子以孝友也勤儉也雖遺產無幾尙不足以供饘粥而遺言可寶不啻琬琰是卽龐德公所謂遺之以安者也

辛未年六十一歲三月大兒夢麟辭三館告假回原籍省親七月朔驚聞關內蝗蟲飛至關外已過甯遠抵錦縣矣余會同在城滿漢文武各官率紳士旗民人等郊外虔禱幸荷上天仁愛連日霖雨蝗不入境民大悅初建社稷壇及八蜡廟於南郊重民事也七月初二日午時妾姚

民生一女閏七月余自序年譜成付四兒抃鶴持歸授梓藏板於家廟八月初二日妾盧氏攜所生女到縣署十一月二十四日余生辰也次男友恭適以是日至余憫其今日之來遂不復責其昔日之去詢家音知老妻病稍愈壽筵前余頗有喜色因念及友恭與其弟振鷺所受分廳屋尙未有堂名余手書允宜堂三字以賜之且命之曰小子識之虞書云允迪厥德允信也天保之詩曰俾爾戩穀罄無不宜孔子曰義者宜也宜字內蘊蓄無窮而余名斯堂也蓋專取宜兄宜弟之意欲兒輩式好無尤如桃夭章之三咏宜家螽斯章之三咏宜爾子孫者其休嘉皆寓於此惟祈我後人聚處斯堂者咸能觸目警心則終焉允臧宜其遐福矣

壬申年六十二歲春夜兀坐次子友恭侍側偶拈動心忍性四字以訓之曰吾人一生德業皆

由心生心本極靈動者只因不用其心則心不
動終日如死灰如槁木遇親長而漠然不知愛
敬矣對詩書而茫然不思誦讀矣頑蠢一物與
禽獸何以異細玩朱註云竦動二字不啻聞鐘
鳴聆棒喝朝夕間俾此心瞿然凜然則其心自
動先儒所謂得常惺惺法便活潑潑地也心動
則觸處皆靈於倫理則天良畢現凡孝親友悌
之意油然而生於學問則思路日開凡讀書作
文之時豁然有得企正人而慕心動矣恥非幾
而愧心動矣智愚賢不肖之別惟在此心能動
與不能動耳性貴乎忍此性字乃氣稟嗜欲之
性最難檢束世人但知任性或徇之或縱之性
狃於宴安則惰其筋骸弗克勤矣性耽於豢養
則恣其口體弗克儉矣身名之成敗家國之興
衰其所分皆由於能忍與不能忍也註中堅忍
二字最着力必須有定見有定守如老松之歷

冰霜如精金之經鍛鍊熬得住耐得久處窮而
簞瓢傲緼澹薄自安卽處達而食韭菹擁敗絮
仍不變塞焉蓋忍性卽所以遏欲也能遏欲方
能存理古今來聖賢豪傑大率從此中砥礪出
來兒孫輩宜大書動心忍性四字寘諸座右三
月麟兒假滿進京補原官陞右春坊右中允不
數月卽轉左春坊左中允兼翰林院編修

欽點日講官起居注十月初六日家人賚領康

熙二十七年十月二十三日 覃恩勅命貳軸

到縣卽親往郊外跪接恭設香案於署中原供
奉先人神位前宣讀

癸酉年六十三歲三月余方在新民屯隨 欽
差大人丈地忽接凶問聞內子趙孺人於原籍
溘逝嗚呼痛哉奈日侍諸臺會丈倥偬雖欲放
聲一慟而不可得惟終宵伏枕隕涕而已夏四
月望後事竣回署始得易服舉哀設奠於趙孺

人靈位之前而哭之曰嗚呼孺人竟死耶孺人
乙亥生少余四歲吾尙未死而孺人竟死耶孺
人累世與吾家舊姻先內父以孺人生而有吉
夢篤愛之不輕以許人嘉余幼聰穎有異資遂
踵門見許焉當是時孺人甫四齡也自幼締姻
偕老如一今倏焉舍我而長逝能不悲悼况孺
人生平懿行尤不能頃刻忘者孺人性至孝其
本生父母高年無子一切養生送死皆賴孺人
雖已嫁而孺慕殷殷歷數十年如一日痛吾父
吾母虛生我不孝謫宦天涯遠離膝下吾二親
朝夕饗殮孺人供之寢疾湯藥孺人奉之甚至
痛心割股求以身代呼天不應兩遭大故凡附
身附棺必誠必信子職所未及盡者孺人爲不
孝子兼盡之嗚呼孝如孺人而可以死耶孺人
素有賢德自十九歲于歸貞靜溫淑壺範夙嫻
行年二十四尙未有所出吾戊戌成進士除授

福州司理孺人鬻簪珥告舅姑先爲余娶妾張氏於房中俟余旋里同之任嗣後復納妾范氏王氏盧氏姚氏等孺人皆推食食之推衣衣之其不妬蓋出於誠然而非有所強勉者畜童婢以恩待宗親以禮嗚呼賢如孺人而可以死耶孺人生子女九人多不育僅存嫡長子夢麟餘子六七人皆庶出也孺人拊字劬勞均如己子待庶媳與冢媳等愛庶孫不啻若嫡孫焉慈惠之至也嗚呼慈如孺人而可以死耶方余爲諸生時遭家多難衣食不充余嘗從館中歸來因焚膏不繼燃松節爲燈孺人紡績余讀書至中夜飢甚索米爲炊孺人曰宿舂不盈升若今夕煮此則來日高堂無早膳矣蓋忍諸孺人常資棉紗以易米憶甲午秋八月發榜之日報中式者至門孺人棉紗猶在手也茹荼數載暨余筮仕後孺人猶勤於紡績不少倦所食蔬惟有糟

一盤余每見之歎曰真所謂糟糠之妻也蓋孺人治家省約或偶有穀菽僅足爲老親膳爲先生饌耳況子息日繁待哺者衆安能自爲口腹計哉孺人一蚊帳三十餘年雖敝不易衣裙皆補綴者其食糲衣麤蓋天性使然邇年來因長子金門索米典借甚多余又遠任荒邑不遑內顧家計日窘孺人黽勉有無艱辛彌甚嗚呼克勤克儉如孺人而可以死耶聞孺人於二月初四日卒余卽於是夕夢孺人向余呻吟作永訣之狀余驚覺隨寄字麟兒詢孺人安否不踰月而訃音至嗚呼始猶以爲夢耶孰意其果死耶古語云一棺長閉萬事皆空念孺人爲余內助四十年余未仕則在館旣仕則在署孺人倡隨之日少獨居之日多自少至老夙興夜寐焦勞樽節一絲一忽何莫非從孺人心手拮据中來耶余一官潦倒宦橐蕭然卽所遺田房分授諸

子亦未知其克念母氏勞苦以勿替引之否耶
諸子中惟孺人所生麟兒幼羸弱其所以珍惜
之調護之者靡所不至兒始生數月偶乏乳孺
人含飴和粥以啖之雖隆冬一夜十起兒三歲
日服保元湯孺人必親自煎之兒出痘孺人傍
徨省視忘餍廢寢者十餘日兒從師書館每饋
食孺人必傳訊書僮聞兒善飯乃色喜由孩提
以及娶婦生子成名受爵無時無處不費孺人
之經畫者辛未春孺人以失血病卧麟兒曾請
假省親疾稍愈卽促之詣闕晉宮僚直講
幄孺人方寄語惓惓勗之以勤慎期之以遠大
也乃未幾而病劇矣孺人辭世之日祇有庶子
視含麟兒官於京兒媳率所生子女皆隨宦京
邸無一侍側仍如吾父吾母仙遊時雖有子而
若無子焉噫人生世間不但名利財產日一瞬
皆與我無涉卽眼前兒女乃父母畢生竭盡心

力以養之教之者既生死不能相顧亦於我何有也嗚呼孺人死矣余心灰矣自悵以衰病之身處多凶多懼之地援例無資告休不允日在湯火中既痛先靈露處安厝無日更聞庶子失教暴棄無成憂心如焚莫可告語惟孺人生前嘗與余同憂共苦今歿後亦必當聆余之哀詞而鑒余之苦衷也孺人有知尙默相余九月二十三日鶴兒生子名敬詒

甲戌年六十四歲余憫應站人役遠離田廬枵腹供應常遭往來員役之鞭責艱苦不堪隨具詳哀籲尹憲會同盛京兵部公同給示張掛各站嚴禁單外勒索時有採取樺皮弓匠木坤大等違禁騷擾余申憲咨部照例處分自此往來差使稍知斂戢廣邑土著民丁甚少而各省窮民之餬口關外者甚多凡滿洲漢軍兵人及八旗下各庄頭家之農田開館者皆雇往來之

民聽其役使稍不如意卽加苦拷或致斃命毫無顧忌蓋傭工者皆異鄉孤子旣無家屬控訴而州縣官又以不係在籍之民誰肯破情面與旗人作對痛此旅魂益寃無告余稔知慘毒每過旂屯必傳集屯撥什庫停驂嚴諭或謂余曰彼非吾民也何事越俎余應之曰從來有分土無分民念彼遠適此邦而求食均吾赤子也奚忍置之膜外嗣後受雇之人有被家長虐死者

該屯撥什庫必報縣無敢隱余聞報卽星馳驗明傷痕申解大部由是傭工者獲甦不致枉死二月廿八日次兒友恭生子名戌生次媳潘氏產後病卒戌孫蒙外祖潘惟五撫育恩踰所生五媳狄氏於初三日產女後亦卽病歿嗚呼痛哉四月次兒友恭四兒抃鶴五兒振鷺來省十月遣四兒歸十一月初一日四兒生子名長生乙亥年六十五歲二月初九日麟兒生子名蔭

孫十一月次兒友恭娶金沙庠生李觀貞女爲繼室廣邑安化社民彭大貧且老其幼子三兒自幼聘月盛社民張希孔之女希孔亦貧甚久爲旗下巨富汪姓佃戶常稱貸以度荒苦無以償自念所生女年十五頗有姿色遂同妻王氏攜其女送與汪宅願爲婢妾蓋已不思舊嫻矣彭大係比鄰卽具詞控縣甫出票喚訊而汪姓隨託富豪來謁以利誘余以勢脅余謂此女已入汪門縱差拘必不出公蒞任久豈不知汪某爲旗下之多金而有力者耶法恐不行且彭姓夫妻父子因飢寒切身皆願得財退婚矣余曰汪姓居縣城嘗與吾交明知開罪於巨室將爲厲階然吾素以義命自持若苟且瞻徇其如碑上天理人心四字何麾使去余卽日單騎至汪家渠兄弟叔姪畢集余正言以規之復婉言以勸之曰以子之家何少此一農家女倘必求畱

之縣官義不能默默自必徧申部府提訊子雖與大人厚能無酬乎矧子常往蘇杭商販何不於彼覓一少艾而欲奪本地貧民之原聘以取惡名耶聞子年踰四十尙無子若效古人還妾之義舉以此女仍歸彭姓完婚德莫大焉天高聽卑必賜汝子以昌厥後汝其三思之汪姓一門皆合掌曰公真勸善大師也敬從命立召張希孔將其女領出余卽斷還彭三兒合登汪姓果於次年生一子邑人咸以爲美談

丙子年六十六歲三月十二日亥時妾盧氏生子名驥兒

丁丑年六十七歲夏四月四兒抃鶴到署秋八月大兒夢麟自原籍來省在縣十餘日嘗往醫巫閭山觀音閣等處登眺山之南有寶林寺古刹也去縣七十餘里因於中秋前一日偕大兒四兒同往憩息僧房口占一律云爲憶寶林勝

呼兒載酒過山空惟落葉徑仄欲捫蘿陟巘瞻
天近倚樓得月多歸途觀刈穫不覺醉顏酡大
兒亦屬和焉回署後卽辭余進京候補是秋爲
五兒振鷺援例入監
戊寅年六十八歲余歷俸十載有餘夏四月陞
刑部江西清吏司主事六月十五日五兒振鷺
自京親賚吏部文憑到縣卽於十六日送奉天
府隨委本府經歷張陞徵署理廣甯縣事余離
任後每日同署印官詣倉廩盤量歷年存貯米
荳及積穀等項皆溢額並無短少蓋余每年所
收糧皆照數封貯從未取出升合故不至如各
州縣之以虧空自罹法網也七月廿九日署印
官始造報交代清冊出具並無未完錢糧盜案
等項印結由錦州府轉申奉天府給發文憑余
辭別諸臺於八月初九日自廣甯起行是日也
闔邑官紳士民遠近老幼莫不遮道泣送以城

外去思碑未足以申其愛戴復立碑於縣堂以紀余任內治蹟余遜弗敢當其父老子弟皆頂香叩稟謂吾儕小人何能掄揚萬一亦畧述公之惠政數大端使將來蒞茲土者得倣而行之則公雖去而德澤世世不朽矣八月廿二日進京寓孫公園廿五日赴刑部江西司到任查本司事件有自本省巡撫具題到部者曰科抄有據旗民赴部控告發司者曰現審余日詣本司

晨而入晡而出與同司滿漢各官隨事公審看

稿說堂

己卯年六十九歲正月開印後本部尙書李公振裕侍郎田公雯徐公瀚公委余爲律例館纂

修官

庚辰年七十歲春二月廿五日陞本部河南清吏司員外郎三月初九日到任仍留律例館纂

修

辛巳年七十一歲六月廿五日陞本部山東清
 吏司郎中恭遇 皇上西巡候回鑾引見後九
 月廿七日到任仍留律例館纂修 欽賜
 壬午年七十二歲六月初九日保和殿 欽賜
 御書一幅七月紫芒五里香近園遺種祝禎祥
 炎方塞北皆稱瑞稼稽天工樂歲穰庚辰秋觀
 稻作併書余捧歸邸寓朝夕焚香虔奉而大兒
 夢麟亦以備員 宮僚獲叨 恩賜 龍章鳳

藻父子均沾真異數也秋九月五兒振鷺江南
 鄉試中式第七十九名 皇上萬
 癸未年七十三歲三月十八日恭遇 皇上萬
 壽 欽賜紅藍內緞各一端大沛 覃恩頒領
 誥命二軸奉 天承運 皇帝制曰誼篤靖
 共入官必資於敬功歸誨迪能仕而教之忠爰
 沛國恩用揚庭訓爾黃鳴珂乃刑部山東司郎
 中黃如瑾之父躬修士行代啟儒風抱璞自珍

克毓珪璋之秀析薪能荷彌彰杞梓之良茲以
覃恩贈爾爲奉政大夫於戲貽令聞於經籙義
方久著佩徽章於策府禮秩加優茂典丕承湛
恩永荷一制曰移孝作忠懋簡勞臣之績推恩
錫類式揚賢母之名載賁榮綸用宣懿範爾刑
部山東司郎中黃如瑾母潘氏早嫻典則夙著
規型敬以從夫宜室聿徵其順德勤於訓子備
官一本於慈祥茲以覃恩贈爾爲宜人於戲荷
彩翟之天章徽音益暢披彤毫之仙藻惠問常
流祗服寵光永綏福履

奉天承運 皇帝制曰西曹贊政必資明允
之才北闕敷恩用獎寬平之績爾刑部山東司
郎中黃如瑾奉職惟勤存心克恕歷爽鳩之署
祥刑每切夫哀矜參棘木之班慎罰允推其欽
恤茲以覃恩特授爾階奉政大夫錫之誥命於
戲一成不變尙惕慮於冰淵三又制刑益襄猷

於嘉肺 制曰臣心恪慎著懋績於周行婦職
修明樹令儀於中闈爰頒慶典俾荷榮褒爾刑
部山東司郎中黃如瑾妻趙氏茂族含芳名門
作儷素風白矢克敦圖史之型清節相規無改
縞綦之度茲以覃恩贈爾爲宜人於戲表從夫
之大義翟莠承恩沛逮下之深仁魚軒被寵祇
承休命永播幽貞五兒振鷺下第大兒夢麟亦
以病乞假辭余南歸余以妾盧氏所生長女年
已長遂命并攜其兩子同歸九月十一日奉
命分校武闈 欽賜表裏各一端廿五日撤棘
余得士二十五人冠本房者會元曹維城也
廷試仍居第一與二甲孫四知李庸袁國琮李
燦馬觀伯時爲煥吳方熹王萬化葛寅李斯援
宮夢熊等十二人俱 欽點御前侍衛十月爲
考兒援例入監命名兆熊是月十三日長孫恂
孺生子名槐兒

甲申年七十四歲六月廿五日陞浙江金華府
知府八月四兒抃鶴來省九月 皇上避暑回
鑾廿七日引見 乾清門跪奏履歷畢 上顧
少宰傅公曰黃如瑾科分雖深精神健旺人狠
去得余感激知遇誓將潔已率屬勉圖報効在
邸寓終日鍵戶不延一幕客不收一僕從襍被
圖書蕭然無累一如初選福州時十月廿五日
領文憑十一月初三日挈家南歸十二月初二
日抵里初三日卽往仙山展墓命鶴兒辦祭祭
畢設席與族中老幼暢敘盡歡而散各房每戶
贈白鏹一錠不敢言惠聊表寸心是晚宿於靈
柩旁臨行拜辭流涕欷歔不自勝未知何日得
卜吉安葬也兒輩其善繼予志復往趙氏之梅
巷省內父內母墓至河口下船而返初六日扁
舟赴浙官吏無一人知者大兒四兒送至錢塘
江干卽諭之歸五兒長孫隨行至屬邑蘭谿已

擇十八日到任矣十四日夜半忽發痰疾遂艤舟度歲大兒四兒聞之卽延醫借來是年七月二十日四兒抃鶴生子名華孫十一月廿九日六兒柱鰲生子名金孫志喜也

乙酉年七十五歲調治之餘積痰漸減因於正月廿六日力疾到任接理金華府事金華爲浙重地所屬八邑案牘繁冗厯稽前任鮮陞去者况余病餘精力衰耗步履艱難倘偶一疎漏貽

悞不淺遂於奉憲頒給蠲免錢糧告示及觀風合屬分題試後卽具文乞休二月廿六日出府署三月初四日抵家諸子孫曾環集問視亦天倫樂事也七月文宗張景峯侍講科試大房次孫長孺二房長孫粹然同入泮十一月粹然娶婦宋氏監生應揚公女五兒振鷺爲生母服闋卽促之公車北上

丙戌年七十六歲二月二十六日午時遺筆

男

夢麟 扶鶴

振鷺 兆熊

全校字

明於文公車非士
 蘇東九盤土氣想公
 正兒辨說欲半掛
 謝閣
 將對辭二氣疑經
 卷同人特十一日
 蘇烈
 倫樂事也水氏交
 宗遊景峯持精探
 論大
 器王民師四日
 班寒
 結
 合圖食融屬發
 昭具文之於二
 民廿六日出
 對不致
 蘇烈奉
 遠願
 係
 繼
 或
 勤
 勤
 合
 示
 又
 歸
 風
 跋
 金華公年譜兩卷自崇禎四年辛未十一月始迄康熙三十年辛未閏七月止皆公生前手定付梓以授 高高祖中允公者自辛未八月至四十五年丙戌二月則 中允公奉 公遺筆偕羣季分校續刊者也意當時持贈年世寅好暨門下士者居多故本邑轉屬寥寥至家藏舊板及原刻成書兵燹後慘遭秦劫縱欲守缺

抱殘已無覓處幸同里王勉齋先生以抄本見
 寄遂使數百年手澤失而復得殆公靈爽所
 憑將留此為後嗣式耳溯童年艱苦述宦海風
 波觀此可以動心忍性誌科名甲乙紀恩遇
 優隆觀此可以奮發興起若夫祖訓官箴恤
 民課士諸大端後有作者尤宜恪守遵行則是
 編之出敢不仰體前人垂裕之深心哉幹椿先
 於戊寅歲用活字板排印二百餘冊比年以來
 率為友人攜去同懷弟惠游幕楚南回里應試
 恭閱之下覺訛舛尙復不少爰悉心重檢敬畀
 手民非遽能述祖德也亦數典不忘之微意
 爾

崑維

光緒歲次甲申二月初吉曷孫幹椿謹誌於舊

第之允宜堂

仍孫蘭蓀校字

從清 禎祥

光緒二十六年仲秋族孫 霈 登甲仝校重刊

含章 國彬

[Faint bleed-through text from the reverse side of the page, including characters like '霈', '登', '甲', '仝', '校', '重', '刊']



